

自县至，带到胡道生制备木器数事。周兰徵、周南山自乡巢谷回省，盖仍不能满千缗也。陈杏生来谈，述其原委，由陈少轩转托丁子开以事来问，有假予名帖言事者，一考究其确否也。

初三日。赴马王庙回拜李次青。早邀邹咨山、陈葵心、殷竹坞、易芝生及子瀚小酌，其意专为子瀚饯行也。陈葵心至逾两时之久始至，暑日久候，尤为烦苦。邹咨山告言：新化经学始于欧阳埭字文思，号了翁，渊博为一时之冠，专治汉学，精于《三礼》。次则吴思树，号建轩，为邹叔绩之外祖，著有《通史》一千卷，为朱笥河门人，以书献之笥河，未及发还，而笥河卒，思树亦旋卒，其书遂失传。今惟存《上朱笥河书》，言《通史》体例甚备。又有《黄河论》七篇。次吴国琅，字仲良，为邹咨山姑丈，专精汉学。次邹文苏，字望眉，叔绩之父，治算学、乐律，兼通《三礼》。叔绩算学之精，其家传然也。此四公者，皆无成书行世，故为可惜。

初四日。接黄石珊、吴莱庭二信。石珊已补兴山县缺，以新例先补正途二人，再补各班一人，遂蒙叙补。书中历叙四月赴省，回至汉川之汪家嘴，舟覆呼救，有炮船过，竟置不顾。船将沉矣，乃得民船拯救，舟中人皆幸免，而行李损失多矣。又以刊刻《夏忠靖集》及《安愚斋集》，助刻资廿两，以志景仰先贤之意，其心亦殊可嘉，由其子埭生送至。龙海门、黄笛帆过谈。

初五日。余光勤赴黎平，便寄周桂伍一信。子瀚赴日本，便寄黎莼斋一信。又专李祥恺、周兰征赴上（沪）〔海〕，寄徐雨之、黄泳清二信。又便寄张笠臣、姚彦嘉二信。亦接张笠臣一信，言票事本末甚悉。回拜邓春田、龙霁生、龙研仙，中途遇雨而返。罗小垣及麓安过谈。又寄衡唐、笙陔两叔信，并托子惠代寄。自立秋后，奇热为数年所未有，本日一雨，又复作凉，今岁天时反

复，亦一奇也。

初六日。邓春田、余云涛、罗小垣、罗叔循及子惠过谈。小垣强予函致刘牧村，求一留之，并多方自为粉饰。春田至，问之，则直责其终岁不一至局，予亦无词以解也。

初七日。黄海华已刻物故，一往哭之。黎简堂初五物故，亦至是始报知，兼往一奠，晤其兄镜吾及彭润生。已而郭定轩至，出示所拟遗折，为之改订，兼拟开一节略，呈卞诵生中丞，请其入奏。李次青亦随至。回拜王逸吾、瞿子玖、余云涛、张奎生、陈舫仙，兼一过左巨云。

初八日。子瀚始以是日成行，遣李祥恺随行赴上海，加给张笠臣、姚彦嘉二信。（门）〔船〕泊草潮门外，一往送之，满船宾客，坐席为满。又为宋祥、柳诚致萧岷山一信，为刘翊清致陶幼瑜一信。郭定轩、但少村、吴稚云、胡幼森过谈。是日青石桥失火，闻延害至数十家。

初九日。王逸吾、刘牧村、黄镜亭过谈。镜亭为黄汉皋之子，并携到黄汉皋《尚书集传异同商》、《春秋传说辨正》二种。询知黄玉屏为其从侄，镜亭赴省时，玉屏尚未抵家也。接张笠臣信，并江督复奏缉私情形。又接黄子寿寄到何愿船《朔方备乘》一部，及《直隶水道》，及《中俄交界图》。寄张子衡信并县志一部，托余云涛递寄。

初十日。回拜郭定轩、李次青、傅青馥、李辅堂、龙霁生、龙研仙。并诣孙春皋慰问，青石桥火警烧及臬署辕门也。李次青处晤刘祝亭、任宇田、马吉山，并永定吴赞臣，善谈相法，所言亦时有合者，并语及笙陔叔在永定加意学校，极有声誉。

十一日。接曾沅浦宫保、张笠臣二信。沅浦信由永兴发递，盖耒河以上，滩高水涸，无由上达瓦窑坪，即在永兴登岸也。笠